



REPUBLIKA E KOSOVËS/REPUBLIKA KOSOVA  
GJYKATA KOMERCIALE

---

Numri i lëndës: 2021:264650

Datë: 28.06.2024

Numri i dokumentit: 05876218

KPPP.nr.2039/23

GJYKATA KOMERCIALE E KOSOVËS, Dhomat e Shkallës së Parë, Departamenti për Çështje Ekonomike, Gjyqtarja Verona Dibra, në çështjen përmbarimore të kreditorit Korporata Energjetike e Kosovës SH.A. - Divizioni i Furnizimit, me seli në Mitrovicë, kundër debitorit OF Xhamia Samadrexhë, me seli në Vushtrri, duke vendosur lidhur me propozimin e kreditorit për përmbarim, jashtë seancës, me datë 28.06.2024, merr këtë:

A K T V E N D I M

- I. Hapet konflikti i kompetencës në mes të Gjykatës Komerciale të Kosovës, Dhomat e Shkallës së Parë, Departamenti për Çështje Ekonomike dhe Gjykatës Themelore në Mitrovicë - Dega në Vushtrri, për të vendosur në çështjen juridike përmbarimore në mes të kreditorit Korporata Energjetike e Kosovës SH.A. - Divizioni i Furnizimit, dhe debitorit OF Xhamia Samadrexhë.
- II. Për të vendosur lidhur me konfliktin e kompetencës lënda i dërgohet Gjykatës Supreme të Kosovës.

A r s y e t i m

Gjykata Themelore në Mitrovicë - Dega në Vushtrri, Departamenti i Përgjithshëm, me Aktvendimin E.nr.647/2012 të datës 30.10.2023, është shpallur jo kompetente në pikëpamje lëndore për të vendosur në këtë çështje përmbarimore, ndërsa lëndën ia ka dërguar Gjykatës Komerciale, Dhomave të Shkallës së Parë, Departamenti për Çështje Ekonomike.

Dhomat e Shkallës së Parë të Gjykatës Komerciale, Departamenti për Çështje Ekonomike, gjatë shqyrtimit paraprak të lëndës gjeti se çështja e cila është objekt i saj përfaqëson çështje për vendosjen e së cilës kjo gjykatë nuk ka kompetencë lëndore, por që për vendosjen e kësaj çështje është kompetente Gjykata Themelore në Mitrovicë - Dega në Vushtrri, Departamenti i Përgjithshëm, për arsyt si në vijim:

Nga shkresat e lëndës, rezulton se kreditori lidhur me këtë çështje përmbarimore, propozimin për përmbarim e ka paraqitur në Gjykatën Komunale në Vushtrri, me datë 27.11.2012, ndërsa Gjykata ka lejuar përmbarimin e propozuar përmes Aktvendimit E.nr.647/2012 datë 14.12.2012.

Debitori me datë 24.03.2017 ka paraqitur prapësim kundër Aktvendimit E.nr.647/2012 të datë 14.12.2012 të Gjykatës Themelore në Mitrovicë – Dega në Vushtrri.

Gjykata Themelore në Mitrovicë – Dega në Vushtrri me Aktvendimin E.nr.647/12 të datës 17.08.2017, ka refuzuar si të pabazuar prapësimin e debitorit të ushtruar kundër aktvendimin mbi lejimin e përmbarimit E.nr.647/2012 të datës 14.12.2012.

Gjykata Themelore në Mitrovicë – Dega në Vushtrri me Aktvendimin E.nr.647/2012 të datës 30.10.2023, është shpallur jo kompetente në pikëpamje lëndore për vendosje në këtë çështje juridike përmbarimore.

Në rastin konkret nga shkresat e lëndës rezulton se nuk ka mjet juridik, përkatësisht prapësim për vendosje nga ana e Gjykatës Komerciale, meqenëse kjo çështje përmbarimore është në fazën e ekzekutimit me qëllim të realizimit të kërkesës së kreditorit, andaj në këtë fazë të procedurës, Gjykata Komerciale nuk ka kompetencë për të vendosur për çfarëdo lloj kërkesë, pasi që kompetenca e Gjykatës Komerciale në çështjet përmbarimore është e rregulluar me nenin 13 të Ligjit nr. 08/L-15 për Gjykatën Komerciale, me të cilin në paragrafin 1, pika 1.2 përcaktohet se: *“Gjykata Komerciale është kompetente për të gjykuar, dhe ka juridiksion ekskluziv për të gjykuar, në Dhomat e Shkallës së Parë dhe Dhomat e Shkallës së Dytë: 1.2. : të gjitha mjetet juridike, siç përcaktohet me ligjin e aplikueshëm për procedurën përmbarimore, për çështje brenda kompetencës të kësaj gjykate.”*

Ndërsa, mjetet juridike në procedure përmbarimore, konform ligjit të aplikueshëm, Ligji nr. 04/l-139 për Procedurën Përmbarimore (tutje: LPP) janë të përcaktuara në nenin 67, sipas të cilit në paragrafin 1 përcaktohet se: *“Në procedurën përmbarimore, mjetet e rregullta të goditjes*

*janë: 1.1. Prapësimi dhe 1.2. Ankesa,” ndërsa me nenin 68 të po të njëjtit ligj, përcaktohen Mjetet e jashtëzakonshme juridike, ku decidivisht përcaktohet se: “1. Nuk është i lejuar revizioni dhe përsëritja e procedurës në procedurën përmbaremore. 2. Kthimi në gjendjen e mëparshme është i lejuar vetëm në rastet e mos ruajtjes së afateve për paraqitjen e prapësimit dhe ankesës kundër vendimeve të përmbareushëm për përmbareimin me dhunë.”*

Në rastin konkret, lënda e cila është transferuar në këtë gjykatë ka për objekt ekzekutimin e përmbareimit, ndërsa nuk ka për objekt shqyrtimi mjetet juridike në procedurë përmbareimore të përcaktuara në nenin 67 dhe 68 të LPP-së, ashtu që në kuptim të dispozitave nga neni 13, pika 1.2 të Ligjit për Gjykatën Komerciale, kjo gjykatë nuk ka kompetencë për vendosje në këtë çështje përmbareimore.

Andaj, duke marrë parasysh faktin se objekt në këtë çështje përmbareimore është ekzekutimi i përmbareimit nga gjykata si organ përmbareues sipas propozimit për përmbareim të kreditorit, ndërsa në shkresa të lëndës nuk ka ndonjë mjet juridik për të cilin Gjykata Komerciale do të ishte e kompetencës për të vendosur, kjo gjykatë vlerëson se pikërisht Gjykata Themelore në Mitrovicë – Dega në Vushtrri, Departamenti i Përgjithshëm është gjykatë kompetente për vendosje në këtë çështje përmbareimore, kjo në mbështetje edhe të dispozitave nga neni 5 i LPP-së.

Nga sa më sipër, në kuptim të nenit 24 dhe 25.2 të Ligjit për procedurën kontestimore, lidhur me nenin 17 të Ligjit për procedurën përmbareimore, u vendos si në dispozitiv të këtij aktvendimi.

Dhomat e Shkallës së Parë, Departamenti për Çështje Ekonomike

KPPP.nr.2039/23, datë 28.06.2024

Gjyqtarja  
Verona Dibra

**KËSHILLË JURIDIKE:** Kundër këtij aktvendimi nuk është e lejuar ankesa.